

1 Timoti

Pol mij ned ak Timoti nop ñu kil tikak

1 ¹Timoti. Yad Pol. God Di Komiñ Yokep Bi Kib cin ak abe, Krai Jisas cin niñ dil gos sek midobin Bi Kib ak abe, apil mal yip ag ler, Krai Jisas minim tep dad ameb bi ne alap midebin. ²Timoti. Krai minim tep ak nep ag ñenek, Krai Jisas niñ dipan ak me, nep ñi tep yad, agil niñin. Bapi God, Bi Kib cin Krai Jisas, nep yimig niñil, di tep gil, kod mid tep ger me, nak kapkap mid tep ginimin.

Minim tom niñ dinimel rek lip ak, kirop ag ñi tep ginimin, agak

³Yad ned Masedonia Propins amnig gil, nep taun kib Epesas di lil minim ag ñenek ak, miñi ak rek nep kauyañ agebin: nak Epesas siñak midil, bin bi God Minim agobin apal pen kiri minim esek agebal bin bi okok kirop mer agil, ag ñi tep ginimin. ⁴Minim kesim esek ar dil agebal ak, “Apis based cin nig gil nig gil tikel owip,” agebal ak, nak agek kirig ginimel. Minim ar nibak agil, pen pen nep agebal. Minim esek ar nibak bin bi okok kirop agel, God ne bin bi di komiñ yoknig geb minim tep ak ma niñnigal. Nib ak, kiri Krai minim tep ak niñ dinimel rek ma linigab. ⁵Bin bi Jisas niñ dipal okok kiri pen pen midmagil linimel, agil, nep minim nibaul agebin. Midmagil kiri nab adañ, nag kibiñ ar ak tep, nag kibiñ ar ak timel, niñ tep gil, nag kibiñ tep ar nibak amenigal ak, kiri niñid nep ai mam okok midmagil linigal. Kiri nibgil ai mam okok pen pen midmagil lenigal ak, kiri niñid nep Krai minim tep ak niñ dil, ageb rek nep gipal, agil niñnigabin. ⁶Pen bin bi ognap Krai minim tep ak ageb rek kirig gil, bi saköl rek minim yokop okok ag amil apil gipal. ⁷Cin God lo minim ag ñeb bi midon, agil, kaun ma dil bin bi okok kirop ag ñibal ak pen kiri kilis gil minim agobin wagin nibak mideb me ak, agil, wagin nibak tik dam ma niñal.

⁸Cin niñin, God lo minim ne agak ak, minim yipid gil, minim tep yib mideb. Pen cin God lo minim tep nibak dil, gos cin ke niñil sain gil,

abramek genigabin ak, tep mer. Ne agak rek nep ag ñenigabin ak, tep ginigab; mer ak, mer. ⁹Pen cin nipin, God lo minim bin bi gi tep gipal okok kirop ma ageb; bin bi lo minim tib jupal okok kirop ageb. Bin bi God nop ma nipal okok abe, bin bi tap si tap timel gipal okok abe, kirop ageb. Bin bi God nop ma sobok gipal okok abe, bin bi God nop minim timel apal okok abe, kirop ageb. Bin bi nonim nap kiri ke ñag pak lipal okok abe, bin bi cip ñapal okok abe, kirop ageb. ¹⁰Bin si bi si gipal okok abe, bi kiri bin alap eip mer bi alap eip gil gipal okok abe, kirop ageb. Bin bi kiri bin bi ñi pai ognap si dad dapel, wög kirop gipal, bi okok abe, bin bi minim esek apal okok abe, bin bi “God udin yirik niñid agebin,” agil, esek apal okok abe, kirop ageb. Bin bi Krai minim tep ne ak tib jupal okok kirop ageb. ¹¹Minim tep nibak Krai minim tep ne ak nep. Minim tep nibak God melik sek ak yip minim ag ñi ajep bi ne alap ag lip.

Bi Kib Pol nop yimig niñak

¹²Yad Krai Jisas Bi Kib cin ak nop tep agebin. Yip, bi tep yad agil, dil, kilis ne ak yip ñek, bi wög gep ne midebin. ¹³Pen ned yad mid tep ma göligipin. Yad God nop ag juil, Krai Jisas bin bi ne okok kirop gi timel gil, bi timel, bi kal yib midöligipin. Pen God nop ma niñil, minim agak wagin ak ma niñil ginek ak me, yip yimig niñil dak. ¹⁴Bi Kib yip yimig yib niñil, di tep gil, Krai Jisas niñ dep won ak abe, bin bi okok midmagil lep won ak abe, midmagil yad nab adañ yim lak.

¹⁵Minim pis nep niñ dep alap agniñ gebin: Krai Jisas kariñ lim wagin aul owak ak, bin bi tap si tap timel gipal okok kirop di komiñ yokniñ owak. Bi tap si tap timel kib yib goliñip ak yad nep. ¹⁶Pen Krai Jisas yip mapin niñil, di komiñ yoknim, agil, agak, “Bi tap si tap timel yib goliñip nibak nop di komiñ yoken, bin bi okok magilsek niñil agniñal, ‘Krai Jisas ne bi timel nibak nop di komiñ yokak rek, yip ak rek nep di komiñ yokniñgab,’ agniñal,” agak. Niñ ak, kiri Jisas nop niñ del, ne kirop komiñ per midep won ak ñniñgab. Ar nibak nep, yip mapin niñil di komiñ yokak. ¹⁷Kiñ kib ne birarik ped okok midoliñip, miñi mideb, kisen per per nep mideniñgab. Ne komiñ midep won ak nep mideb; kimeb won ak ma mideb. Bin bi nop udin ma nipal. Ne nep God nokim nep mideb. Bi Kib melik akniñ ke sek nibak, yib ne per per nep agon ar amnañ. Niñ akniñ rek tep.

Pol Timoti nop minim alap agak

¹⁸⁻¹⁹Ñi yad Timoti. Nep minim alap agniñ gebin. Minim agniñgain nibak, God ned bin bi ognap gos ñek, nak kisen tari tari ginigan ak aglak rek nep agniñgain. Minim nibak dil, Krai Jisas minim tep ak kilis gi niñ dil, tap tari tep, tap tari timel, agil niñ tep gil, nag kibniñ tep ar ak nep amil, kijeki yakam ne okok eip kilis gil pen pen ginimin. Bin bi ognap nig ma gil, God kirop gos tep ñib ak kiriñ

gil, ap yap pakpal. ²⁰Bi nak Aimenias eip Aleksada eip nig girek agnek, “Nig gipir ak, cin eip jim ñil God nop sobok ma gin. Kirop bi omal kirig gon, Seten pis ak midil, miker yib gek, God nop ag jupir ak kirig ginimir rek lip,” agnek.

God nop sobok gep

2 ¹Minim agnig gebin ak nig gil mideb: cin bin bi okok magilsek gos niñil, kirop God nop sobok gin; bin bi okok kirop tap tari ma midonimiñ, God nop ag niñin; bin bi okok God kirop gi ñil kod mid tep ginimiñ, agil, sobok gin; bin bi okok magilsek God nop tep agin. ²God nop ag niñon, kiñ okok abe, gapman bi kib okok abe, kirop magilsek kod mid tep ginimiñ. Nig gek me, cin kapkap mid tep gil, God nop gos niñlig gi, gi tep gilig gi midonigabin. ³Ñib akniñ rek ginigabin tep. God, Di Komiñ Yokep Bi cin ak, nop ak rek nep tep ginigab. ⁴“Yad bin bi okok magilsek di komiñ yoknig gebin ak, kiri magilsek minim tep yad ak niñ dil, minim tep minim wagin ak niñ tep ginimel,” ag gos ak niñip.

⁵Tari ginig:

God nokim alap nep mideb.

Pen Bi nab niñ ak, ak rek nep nokim alap nep mideb.

God pis kid mideb;

cin bin bi pis kid midobin.

Pen Bi nokim alap nep bin bi di God eip jim ñinimiñ rek lip.

Bi niñak Krai Jisas, ne ke bi yib alap.

⁶Tap si tap timel bin bi okok magilsek gipal okok,

Krais Jisas ne mab bak alañ miñ goñ ne ke dil,
yur kib dil, kimil, saj kib cin niñak pis nep tauak.

Ñib ak, God ag lak ñin ak,

Krais Jisas gak niñak bin bi niñil niñ dinigal okok,
ne kirop magilsek di komiñ yoknigab.

⁷Ar niñak nep, Krai Jisas yip ag lek, yad Jisas minim tep dad ameb bi alap midil, minim tep niñak bin bi okok magilsek ag ñi tep gil, Juda bin bi mer okok kirop Krai Jisas minim niñid ak ag ñi ajpin. Yip wög ag lak niñak, niñid yib agebin.

⁸Bi okok, karip lim magilsek okok, bi ognap kirop milik ma yapek, pen pen ma agil, kapkap jim ñil nep midil, per nep God ageb rek nep gil, nop ñinmagil kilan gilig gi sobok genimel ak, yip tep ginigab.

⁹Pen bin okok ak rek nep kapkap mid tep ginimel. Kimkas kiri ma maliknimel. Tap gol dil kil tep gipal okok, aka bis kibap rek mani kib tauap okok, aka walij mani kib tauap okok ma yimnimel. Bin tap tep tep miñ goñ yimbal okok, bin bi ognap cinop niñel tep gañ, agil, gipal ak, God nop tep ma gip. ¹⁰Pen bin God nop niñ dil sobok gin, apal okok, kiri bin bi ognap okok kirop di tep gil, wög ognap gi ñil, kirop gi tep gil, ginimel. Nig ginigal ak, God nop tep ginigab.

¹¹Bi okok God Minim ag ñenimel ak, bin okok kapkap midil, niñ tep ginimel. ¹²Yad bin okok kirop agebin, kiri God Minim bi okok kirop ma ag ñinigal; kiri bi okok kirop ma kod midenigal. Bi okok God Minim ag ñenimel ak, bin okok kiri minim ognap ma agnimel. ¹³God Adam nop ned gi lil, kisen bin ne Ip nop gi lak. ¹⁴God mab magil mer agak ak, kijeki minim esek agek Adam ma niñak. Bine Ip kijeki minim esek ak niñil gi timel gak. ¹⁵Pen bin okok ñi pai tik dapil, kaun dil, Krai Jisas nop niñ dilig gi, bin bi okok kirop midmagil lilig gi, Krai Jisas minim tep ne ageb rek nep gilig gi midenigal ak, God kirop di komiñ yokniğab.

Bin bi Krai Jisas niñ dipal okok kirop kod midep bi okok

3 ¹Minim niñid yib agniğ gebin. Bi ognap, Krai Jisas nop wög gil, bin bi nop niñ dipal okok kirop kod midon, agil, gos ak nipal okok, gos tep yib nipal. ²Pen kiri bin bi Jisas niñ dipal okok kirop kod midep bi alap din, agniğabim ak, bi gi tep gipal okok nep niñil dinimib. Bin kiri nokim alap nep dil, bi sain tep, gos niñ tep gil, tap timel ma gil, bin bi par okok nib ag wasu dam karip kiri eip nab adañ dil, bin bi Krai Jisas niñ dipal okok kirop ag ñi tep gil, gipal bi okok nep niñil dinimib.

³Pen bi ñiğ wain koñai ñibal okok, bi kal yib jupal okok, bi minim pen pen apal okok, bi agon kilnok kibap mani midmagil lipal okok, kirop niñil ma dinimib. Bi kapkap sain tikil, mid tep gipal bi okok nep niñil dinimib. ⁴Bi bin ñi pai amilgon kiri okok kirop kod mid tep gel, ñi pai kiri okok pen, bapi niñid agip, agil nipal, bi okok rek nep niñil dinimib. ⁵Pen bi bin ñi pai ne ke okok kod mid tep ma ginigab ak, ne titi gil God bin bi ne okok kirop kod mid tep ginigab?

⁶Bi Krai Jisas nop kisen nep niñ dipal okok niñil ma dinimib. Bi Krai Jisas nop kisen nep niñ dip ak, bi kib midebin, agil, yap pakek, God nop minim kib agil, ag ke okok yokniñiñ rek lip. Kijeki birarik nep, yad bi kib midebin, agil, God nop kirig gek, God pen nop ag yokak rek ak, nop ak rek nep ginigab. ⁷Bi diniğabim nib ak, bin bi Krai minim tep ak ma niñ dipal okok niñil, bi ak bi tep, agil gos nipal, bi nibak rek nep niñil dinimib. Mer ak, bin bi Krai Jisas nop ma niñ dipal okok bi nibak nop ag juel, kijeki gon nop dinimij rek lip.

⁸Pen nibi bi kod midep nop wög gi ñeb bi ognap din, agniğabim ak, niñ tep gil dinimib. Bin bi okok, bi ak bi tep, agil gos nipal bi nibak nep niñil dinimib. Kiri minim niñid nep agil, minim tom ma agil, ñiğ wain koñai ma ñibil, kibap kilnok mani tap lip gi ma dil, gipal bi okok rek nep niñil dinimib. ⁹God Minim ak magilsek minim niñid nep agil, kilis gi niñ dil, mid tep gipal bi okok nep niñil dinimib. ¹⁰Nib ak, ned wög sikol ognap kirop ag lem, kiri gi tep geniğal ak niñil agem, bi kodep bi ak nop wög gi ñeb bi midenimel.

¹¹Pen bi kodep nop wög gi ñeb bin ognap din, agniğabim ak, ak rek nep niñ tep gil dinimib. Bin nib okok ak rek nep bin tep nep midenimel. Bin bi okok,

bin ak bin tep, agil gos nipal, bin nibak rek nep niñil dinimib. Bin bi ognap kirop ma ag juil, bin kapkap sain tikil, ñig wain konjai ma ñibil, minim esek ma agil, tap ognap si ma dil, per gos niñ tep gi mideniğab, bin nibak rek nep niñil dinimib. ¹²Pen bi kodep nop wög gi ñeb bi okok, bin kiri nokim alap nep dil, bine ñi pai amilgon kiri okok kirop kod mid tep gıpal bi okok nep niñil dinimib. ¹³Wög gi ñeb bin bi okok wög kiri gi tep geniğal ak, bin bi Jisas niñ dipal nab sıñak yib tep dil, Kraıs Jisas nop niñ di kilis gi mideniğal.

¹⁴Yad nep kasek ninigain, agil, nep mij aul ñu kil tikebin. ¹⁵Pen kasek ma nenim ak, nak mij aul di niñil, cin God bin bi ne, bin bi God per komiñ mideb ak nop niñ dil cöc ne midobin okok, cin titi gil gi tep ginigabin ak, niñnigan. Cin God bin bi ne okok, jim ñil karıp sap kilis yib rek midon me, minim niñid ne ak kir ginimiñ rek ma lip.

¹⁶Niñid nep, God minim ne ageb ak minim niñid yib ageb:

Kraıs Jisas bi miğ goñ lek, bin bi nop mişeñ niñlak.

God Kaun, Jisas gi tep yib nep giğ, agak.

Ejol seb kab ar alağ sıñak nop niñlak.

Bin bi karıp lim tigoñ tigoñ ajil,
minim tep ne bin bi okok kirop ag ñilak.

Bin bi karıp lim ke ke okok nop niñ dilak.

Nap ne nop di melik tep akniğ ke sek
seb kab ar alağ sıñak dad amnak.

God minim tep ag ñobin, apal ak pen minim esek nep ag ñebal

4 ¹God Kaun mişeñ agil agıp, “Ñin kisen bin bi ognap Kraıs Jisas minim tep niñ dipal ak kirig gil, kijeki minim tom nibak niñil, kijeki kiyob ñilik yakam ne okok minim tom ag ñibal ak niñ dil, ar nibak nep kisen ginigal,” agıp. ²Bin bi kijeki minim esek ag ñibal okok, kiri nag ar ak tep, nag ar ak timel, agil gos ma nipal. Gos timid won kiri ak, ak tep, ak timel, apkop, pen gos timid won kiri ak ain milağ rek dagil yinek pis nep kir giğ. Kiri minim esek nep ag ñibal. ³Bin bi niğ okok minim esek agil apal, bi okok bin ma dinimel, bin okok bi ma dinimel, apal. Kiri apal, tap magil niğ okok tap niñeb pen tap magil niğ okok tap ma niñeb asik mosik ginimel, apal. Pen God ne tap magil gi lil, bin bi yip niñ dil minim niñid yad niñ dipal okok, kiri tap magil okok magilsek tep agil niñniğal, agil, gi lak. ⁴God tap gi lak okok magilsek tep nep gi lak. God tap magilsek tep gi lak mideb okok me, cin bin bi tap alap asik mosik ma ginigabin. Tap tep gi lak mideb okok, magilsek tep, agil, di niñniğabin. ⁵Tari ginig: God nop sobok gil, tep giğ, agenigabin ak, God minim ne ageb rek, tap magil niğ okok magilsek ke komiñ tep rek nep mideniğab.

Bin bi okok kirop ag ñi tep ginimin

⁶Minim agebin aul, nanai namam ognap okok kirop ag ñi tep geniğan ak, nak Kraıs Jisas wög gi ñeb bi tep mideniğan. Nak ned ñi sikol midil,

Krais Jisas minim tep ne nep ag ñilak ak niñ tep gil, ageb rek nep kisen gil, gi damil, miñi ak rek nep minim tep ak niñil kisen gipan. ⁷Pen kesim yokop okok ag amil apil gipal okok ma niñnimin. Nak kilis gil, God nop tep ginigab ar ak nep gi midenimin. ⁸Bin bi ognap kilis gil eksais gipal okok, mib goñ kiri kilis ginigab. Pen nak kilis gil God Minim ageb rek nep genigan ak, kilis ke dinigan. God nop tep ginigab ar ak nep genigan ak, karip lim ar wagin aul midenigan ñin aul abe, karip lim ar alañ siñak midenigan ñin ak abe, mid tep ginigan. ⁹Minim agniñ gebin nib aul, minim niñid yib, agil, pis nep niñ dinimin. ¹⁰God per komiñ mideb ak niñ dipin ak me, gos sek midobin. Krais Jisas ne bin bi okok magilsek di komiñ yoknigain, agil, kimak. Bin bi Krais Jisas nig gak ak niñ denigal okok, God per komiñ mideb ak kirop magilsek pis nep di komiñ yoknigab. Cin gos ar nokim nibak nep niñil, wög kilis gi midobin.

¹¹Minim agebin aul, nak bin bi okok kirop ag ñek niñnimel. ¹²Bin bi ognap, nep bi praj, agil, minim agnigan ak ma niñnimel rek lip ak, nak niñ tep ginimin. Pen nak gi tep gilig gi nep gek amek, bin bi Krais Jisas nop niñ dipal okok, nak minim tep ageban rek, nak gi tep geban rek, nak bin bi midmagil lipan rek, nak Krais Jisas nop niñ di wös gipan rek, nak miñ kibij tep ar ak nep ameban rek niñil, kiri ke ak rek nep ginigal.

¹³Yad ninigain ak pen yip kod mideban ñin aul, bin bi okok kirop God Minim ak uñin li aglig gi, minim wagin ak ag ñilig gi, gi midenimin.

¹⁴Pen ned okok bin bi Krais Jisas niñ dipal kirop bi kod midep bi okok, ñinmagil kiri di nabic ar nep ak lil, God kirop gos ñek, nak kisen tari tari rek ginigan minim ak agel, God nep tap tep ke ñak ak saköl ma ginimin. ¹⁵Tap agesin aul, nak gos ar nokim nep niñil, kilis yib ginimin. Nig genigan ak, nak Krais Jisas kanib tep ne ak kilis gil, pig gi rikid ag ameban ak, bin bi okok magilsek niñnigal. ¹⁶Nak niñ tep gil, God Minim ageb rek nep gilig gi midenimin. Niñ tep gil, God Minim ageb rek nep gos niñlig gi midenimin. Nig gil kilis gi dam dam gi midenigan ak, nak ke abe, bin bi minim nep niñnigal okok abe, kirop di komiñ yoknigan.

Krais bin bi ne okok kirop kod mid tep ginimin

5 ¹Bi nap sikop ognap kirop ma ag ginimin; nap nak ke ag ñi tep gipan rek ak, kirop ak rek nep ag ñinimin. Bi praj okok, namam nak ke gi tep gipan rek ak, kirop ak rek nep ginimin. ²Bin nonim okok, nanim sikop nak ke gi tep gipan rek ak, kirop ak rek nep ginimin. Bin praj okok, nanai nak ke gi tep gipan rek ak, kirop ak rek nep ginimin. Nak gos tep ar ak nep niñil, gos timel ognap ma niñnimin.

Bin kanjil

³Bin kanjil ñi pai kiri ma mideb okok kirop kod mid tep ginimin. ⁴Pen bin kanjil ñi pai kiri ognap midenimel, kirop agenimin, Krais Jisas nop

niņ dipal rek, nĭpis nonim sikop ned kirop tap magil n̄oligĭpal rek, miñi kirop pen tap magil n̄il kod mid tep ginimel. Nig genigal ak me, God nop tep ginigab.

⁵Bin kaņil ke ausek yĭb mideb ak, ne God nokim yĭp kod mideniġab, agil, pĭb nab kislim eyaņ God nop sobok gilĭg ġi nep mideb. ⁶Pen bin kaņil yin pin ġi ajpal okok, komiņ midobin, agil nĭpal ak pen kimeb rek midebal. ⁷Minim agebin nibaul, bin bi okok kirop ag n̄i tep ginimin niņil bin kaņil abe n̄i pai sikop kiri okok abe minim nibaul niņil kisen gel, kirop minim alap ma mideniġab.

⁸Pen bin bi an, bin bi ne ke yĭb okok, nĭpis nonim sikop ne ke okok, di tep gil tap niņeb n̄il ma ginigab ak, ne Kraiss minim tep ne ak kirig gil nig ginigab. Bin bi Kraiss nop ma niņ dipal okok, timel yĭb ġip nibak rek ma ġipal.

⁹Pen bin kaņil ognap agil, “Yĭb cin ak bin kaņil okok eip n̄u kil tikil cinop abe tap niņeb tap okok n̄inimib,” agenimel, niņ rep gil yĭb kirop dinimib. Bin milep mi akniĭb n̄in juil omal nokim (60) yinak, bi nokim alap nep dek kimak, bin kaņil okok nep dinimib. ¹⁰Bin kaņil bin bi ognap niņel tep ginimiņ bin kaņil ak nep dinimib. Bin miñ tep ar ak nep gil, n̄i pai sikol kod mid tep gil timid ukek mid tep ġipal okok, bin bi okok nib apel di tep gil tap magil n̄il, bin bi Kraiss nop niņ dipal okok kirop w̄og ognap ġi n̄il, bin bi koslam midil gos par li midebal okok kirop di tep ġip, bin kaņil ak nep dinimib. ¹¹Bin kaņil milep ma lipal ognap, yĭb kirop ma dinimib. Kraiss nop cig ginigabin agniġal ak pen mid damil, midmagil kiri pilis gek, bi kisen nib dil nop cig gin, agil, Kraiss nop kirig gil bi kisen nib diniġal. ¹²Minim kiri ke ned aglak ak tib juniġal ak, God niņek timel gek, minim mideniġab. ¹³Pen bin kaņil milep ma lipal okok, kiri w̄og yĭb ma gil, yokop karip karip ġi ajlig ġi, bin bi ognap ag julig ġi, minim tom ma agep okok aglig ġi, nib ġipal nib ġipal aglig ġi, ġi midebal. ¹⁴Bin kaņil kiri bi kisen nib dil, n̄i pai tikil, karip kiri ke w̄og gil, mid tep ginġal ak tep. Mid tep ginġal ak, bin bi God nop miġik yapek nĭpal okok, cinop ag junimel rek ma liniġab. ¹⁵Pen bin kaņil ognap Kraiss Jisas nop kirig gil bir Seten nop kisen ġipal.

¹⁶Bin Kraiss Jisas nop niņ dipal okok, bin kaņil yakam kiri ke alap midonimiņ, kiri ke kod midenimel. Bin bi Kraiss nop niņ dipal okok jim n̄il, bin kaņil ke ausek yĭb midebal okok nep kod mideniġal. Mer ak, bin kaņil koņai midel, koslam yĭb kod mideniġal.

Bin bi Kraiss niņ dipal okok kirop bi kod midep bi okok

¹⁷Bi kiri bin bi Kraiss Jisas niņ dipal okok kirop kod mid tep ġipal okok, bin bi Kraiss niņ dipal okok, bi nib okok rek kirop di tep gil pe tep n̄inimel. Bi kilis gil Kraiss minim tep ak ag n̄i ajpal okok abe, bi kilis gil Kraiss minim tep ak bin bi ne kirop ag n̄ibal okok abe, bi nib okok rek kirop di tep gil pe tep n̄inimel.

¹⁸ God Minim ñu kil tikil aglak, “Tap wid magil tau cib jakel, magil okok ke lil, cög okok ke lil ganj, agil, kaj kau poñid damil, wid magil ognap ñiñnigal, agil, meg migan kirop nag li ribik ma ginimib; wög gipal rek ak, ognap ñiñnig, ñiñnimel,” aglak. Pen minim alap aglak, “Bi wög gipal okok, kirop pe ñeb,” aglak. ¹⁹ Bi nokim alap nep apil agnigab, “Bin bi Krajs niñ dipal kirop bi kod midep bi ak, nib gil nib gil gi timel gip,” agenimiñ ak, ma niñnimin. Bin bi omal aka bin bi omal nokim rek niñil, apil agenimel ak, niñid apal rek lip, agil, niñnimin. ²⁰ Bin bi Krajs niñ dipal kirop bi kod midep bi ak, tap si tap timel gip ak ma kirig ginigab ak, Krajs bin bi am mogim ginigal ñin ak, magilsek niñ midel niñlig gi, nop ag ginimin. Niğ genigan ak, bin bi ognap niñel, ne kaun dil, kisen nib ma ginigab.

²¹ Bi yad okok gi timel ma gipal, bi nibi okok nep gi timel gipal, agil, gos ak ma niñnimin. Minim wagin midonimiñ ak, niñ tep gil nep agninin. Nep minim nibaul yokop ma agebin; God, Krajs Jisas, ejol ne ag lak okok niñ midel niñlig gi agebin.

²² Pen Krajs bin bi kirop kod midep bi okok, kasek ñinmagil nak nabic kirop ar ak lil, wög nibak ma ag linimin. Bin bi ognap tap si tap timel genimel ak, nak eip ma ginimin. Nak bi asiñ ma mideb rek nep midenimin. ²³ Pen nep tap per per gi, yipil suip ak, nak miñi ñig nep ma niñnimin, ñig wain sikol sikol ognap sek niñnimin.

²⁴ Bin bi tap si tap timel gipal ak, ognap miseñ gel, kasek nep niñil minim ag ginigabin. Pen bin bi ognap tap si timel kapkap we gil gel, kasek ma niñnigabin. Kisen niñnigabin. Mer ak, God minim kib agnigab ñin ak nep miseñ linigab. ²⁵ Pen nib aknib rek nep, bin bi kiri bin bi ognap kirop gi tep genigal ak, ognap miseñ midek, kasek nep niñnigabin. Pen kasek ma niñnigabin ak, we gil midonimiñ rek ma lip.

Bin bi miñ wög gep okok

6 ¹ Krajs bin bi ne ognap kiri miñ wög gep bin bi midebal okok, bi kib kirop tau dolak okok di tep ginimel. Niğ genigal, bin bi ognap niñil, God nop ag juil, Krajs Jisas minim tep ag ñibin ak ag juil, ma ginigal. ² Pen bin bi Krajs nop niñ dipal okok, bi Krajs nop niñ dipal ognap kirop miñ wög gi ñilig gi, gos timel niñil, Krajs bin bi mam cin ke okok tari ginig kirop miñ wög gobin, agil, ma agnimel. Mam tep cin Krajs nop niñ dipal okok kirop wög gi ñobin, agil, wög kirop ak gi tep yib ginimel. Minim ñu kil tikebin aul bin bi okok kirop ag ñi tep gek niñnimel.

Tap koñai din, agil, gos ak nipal

³ Bin bi ognap, Bi Kib cin Jisas Krajs ne minim tep agak ak abe, minim tep ne per ag ñibin ak abe kirig gil, minim ke ognap ag ñinigal okok, ⁴ cin nep bin bi kib midobin, agil, saköl ñagil gos ma midek, niğ gipal.

Nib ak, kiri bin bi ognap kirop gos timel niñil, minim magil ar ak nep pen pen ag amil apil gil, bin bi ognap niñel milik yapek, kal juil, minim timel agil, gos timel nipal. ⁵Kiri Jisas minim niñid ne ak kirig gil, God kanib amnigabin ak kibap kilnok mani tap okok dinigabin, agil, gos timel nep niñil, per per nep minim pen pen apal.

⁶Pen cin Krajs Jisas niñ dil, tap cin bir mideb ak miñ miñ ginigabin ak, cin tap tep yib alap dil, mid tep yib ginigabin. ⁷Ami sikop cinop tik dolak ñin ak, tap ognap sek ugai ma donok. Pen kimnigabin ñin ak, ak rek nep tap ognap sek dil ma amnigabin. ⁸Nib ak, tap ñiñeb ognap, walij cin ognap midonimiñ, tap cin rek sikol me ak, agin. ⁹Pen bin bi tap koñai din, agil gos nipal okok, saköl ñagek, gos nokim nibak kirop lip gi di amek, kimin tap ñiñniñ apel, gon dek, dai yur kib dipal ak rek kirop ginigab. Kirop pis nep gi timel ginigab. ¹⁰Bin bi agon kilnok kibap mani tap okok midmagil lipal okok, tap si tap timel ar ke ke koñai nep gipal. Ognap gos nibak niñil, God nop gos ak kirig gil, mid tep ma gil, kirop ke mapin timel yib ginigab.

God tap ñinmagil ar nep li ñak ak, di tep ginimin

¹¹Timoti. Nak God bi ne mideban ak me, tap timel tap esek agesin aul magilsek bil gil, gi tep gil, God ageb rek nep gil, Krajs Jisas niñ dil, bin bi okok midmagil lil, kilis gil gi damil, bi kapkap sain tikil, gi midenimin.

¹²Nak Jisas niñ dipan rek, ñin ognap miker apek, koslam midenigan, pen nak kilis gil, Krajs minim tep ak kisen ginimin. Bin bi koñai niñ midel niñlig gi, yad Krajs Jisas nop niñ dipin, agnak ñin nibak, ne komiñ per midep won ak nep ñak. Komiñ per midep won nibak di wös ginimin.

¹³God tap okok magilsek komiñ won ñeb ak abe, Krajs Jisas Podias Pailot nop minim yipid gil agak ak abe, kiri niñ midel niñlig gi, nep kilis gil agebin, ¹⁴minim nep agebin aul magilsek niñ tep gil, kisen gil, gi tep gil gek amek, Bi Kib cin Jisas Krajs adik gi onigab. Nak niñ genigan, bin bi ognap niñil nep ag junimel rek ma linigab. ¹⁵Jisas adik gi onigab ñin nibak, God ne ke ag lak. Ñin ag lak ñin nibak nep Jisas ne kauyañ adik gi onigab. God Bi tep ke yib. Ne nokim nep tap okok magilsek kod mideb. Ne kiñ okok magilsek Kiñ kiri mideb. Ne bi kib okok magilsek Bi Kib kiri mideb. ¹⁶Pen ne nokim nep kimnimiñ rek ma lip; ne per per nep midenigab. Melik tep ne ak ke yib mideb. Bin bi ognap nop uñin ma nipal yib; bin bi ognap nop uñin niñnimel rek ma lip. Bin bi alap ne mideb mañ siñak amnimel rek ma lip. Ne God Bi kilis yib akniñ ke ak, bin bi magilsek niñil, yib ne ak per per nep agel ar amnañ. Nib akniñ rek tep.

¹⁷Bin bi agon kilnok kibap mani tap koñai mideb okok kirop agenimin, cin nep bin bi ke yib midobin, agil, tap kasek kirig ginigab okok gos ma niñnimel; God cinop bin bi kod midil, mid tep ginigal, agil, tap tep tep koñai nep cinop per ñib ak nep dil, gos sek midojin. ¹⁸Nib ak, kirop

agenimin, tap korjai mideb rek, bin bi okok di tep gil, kirop yimig niñil, tap kiri ognap kirop abramek ñinimel. Kiri bin bi ognap kirop gi tep gil, gi dad amel dad amel, kirop masos ma ginimiñ. ¹⁹Nib akniñ rek genigal ak, kiri tap tep yib kiri alap mideniñab God kariñ lim ne seb kab ar alañ siñak, niñil kiri amil komiñ per midep won ak pis nep dil, per nep per nep komiñ mideniñal. Komiñ midep magil nibak, komiñ magil niñid yib.

²⁰Timoti. God tap ñinmagil ar nep ñi lak ak, di tep ginimin. God nop gos ma niñil minim esek minim yokop per per ag amil apil gipal okok abe, minim saköl ñagek pen pen apal okok abe, ma ñinimin. ²¹Bin bi ognap, minim esek kiri nibak dil, miñi God Minim yipid gil nipin, agil, ke tam ak amil, Jisas minim tep ne niñ dilak ak pis nep kirig gipal.

God nep mapin niñil, kod mideniñiñ.